

**BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
DOM NARODA
Broj:04-011-37/97.
Sarajevo,16.septembra 1997.godine**

ZAPISNIK

**4. sjednice Doma naroda Parlamentarne skupštine Bosne i Hercegovine,
održane 16. septembra 1997. godine u Lukavici**

Sjednica je počela sa radom u 13 sati.

Sjednicom je predsjedavao Avdo Čampara predsjedavajući Doma naroda Parlamentarne skupštine Bosne i Hercegovine koji je po Privremenom poslovniku Doma naroda preuzeo funkciju predsjedavajućeg u narednih osam mjeseci.

Predsjedavajući se zahvalio gospodinu Momiru Tošiću, dosadašnjem predsjedavajućem ovog Doma, na saradnji i radu.

Nakon toga što je konstatovao da postoji kvorum i da Dom naroda može raditi i punovažno odlučivati, predsjedavajući je obavijestio Dom naroda da je Zapisnik 3. sjednice Doma urađen i da će zajedno sa zapisnikom ove 4.sjednice biti dostavljen delegatima na usvajanje.

Za sjednicu je predložen sljedeći

DNEVNI RED :

1. Ratifikacija Ugovora između Bosne i Hercegovine i Svjetske banke,
2. Prijedlog zakona o službenom glasilu Bosne i Hercegovine,
3. Izbor predsjednika i zamjenika predsjednika komisija Doma naroda,
4. Delegatska pitanja.

Ovaj prijedlog dnevnog reda usvojen je jednoglasno.

1. Ratifikacija Ugovora između Bosne i Hercegovine i Svjetske banke

Na osnovu člana IV. 4. d) Ustava Bosne i Hercegovine, Parlamentarna skupština Bosne i Hercegovine, odnosno oba njena doma, odlučuju o saglasnosti za ratifikaciju međunarodnih ugovora.

Predsjedavajući je obavijestio delegate da je Svjetska banka odobrila dva kredita Bosni i Hercegovini, jedan u iznosu od 39 miliona dolara za transport a drugi u iznosu od 11 miliona dolara za obrazovanje i objasnio hitnost njihovog donošenja.

U raspravi nije niko učestvovao.

Dom naroda se prvo izjašnjavao o kreditu Svjetske banke u iznosu od 39 miliona dolara za transport a nakon toga o kreditu Svjetske banke u iznosu od 11 miliona dolara za obrazovanje i jednoglasno ih prihvatio.

Na osnovu rezultata glasanja predsjedavajući je konstatovao da je Dom naroda Parlamentarne skupštine Bosne i Hercegovine jednoglasno dao saglasnost za ratifikaciju Ugovora između Bosne i Hercegovine i Svjetske banke.

2. Prijedlog zakona o službenom glasilu Bosne i Hercegovine

Prijedlog zakona utvrdilo je Vijeće ministara Bosne i Hercegovine.

Predsjedavajući je obavijestio prisutne da je u Predstavničkom domu ovaj zakon usvojen bez alternative za član 6., po kojoj je predloženo da se o objavljivanju zakona stara služba Vijeća ministara, i da je usvojeno rješenje da se o objavljivanju zakona stara Služba Doma naroda Parlamenta skupštine Bosne i Hercegovine. Ovaj prijedlog usvojio je i Predstavnički dom.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamentarne Skupštine Bosne i Hercegovine jednoglasno usvojio Prijedlog zakona o glasilu Bosne i Hercegovine.

3. Izbor predsjednika i zamjenika predsjednika komisija Doma naroda

Predsjedavajući je obavijestio delegate da je na zajedničkoj sjednici Kolegija oba doma dogovoreno da se izaberu samo predsjednici komisija Doma naroda, a da zamjenike predsjednika komisija izaberu komisija na konstituirajućim sjednicama.

Nakon toga data je pauza kako bi se delegati Hrvatske demokratske zajednice konsultovali o prijedlogu kandidata za izbor predsjednika komisije u Domu naroda.

Nastavljajući rad sjednice poslije pauze, predsjedavajući je pročitao kandidate za predsjednike komisija i to:

- u Komisiju o ustavnim i pravnim pitanjima, Mirsad Ćeman(SDA)
- u Komisiju o međunarodnim i spoljnim poslovima, Borislav Paravac(SDS)
- u Komisiju o spoljnoj trgovini i carinama, Momir Tosić(SDS)
- u Komisiju o pitanjima finansija i budžeta, Stipo Vujević(HDZ)
- u Komisiju o pitanjima ljudskih prava, imigracije, izbjeglica i azila, Adem Borić(SDA)
- u Komisiju o saobraćaju i komunikacijama, Pero Marković(HDZ)
- u Komisiju o administrativnim pitanjima, Avdo Čampara(SDA),
- Avdo Čampara će biti predsjednik ove Komisije dok je predsjedavajući u Domu naroda.

Nakon rezultata glasanja, predsjedavajući je konstatovao da je Dom naroda Parlamentarne Skupštine Bosne i Hercegovine jednoglasno usvojio prijedlog za izbor predsjednika komisija Doma naroda Parlamentarne Skupštine Bosne i Hercegovine u predloženom sastavu.

4. Delegatska pitanja

- Mirsad Ćeman postavio je sljedeća pitanja Vijeću ministara i Predsjedništvu Bosne i Hercegovine: šta se poduzima za normalizaciju željezničkog saobraćaja u Bosni i Hercegovini, šta se može učiniti u okviru jedinstvenih institucija Bosne i Hercegovine za uspostavljanje jedinstvene lige za sportska takmičenja u Bosni i Hercegovini i zašto se u medijima entitetima daju atributi države. S obzirom da se pojedini članovi Predsjedništva oslovljavaju u medijima kao predsjednici države, potrebno je da Predsjedništvo sugeriše medijima da njegove članove oslovljavaju u skladu sa odredbama Ustava. Na kraju Mirsad Ćeman je upitao šta će preduzeti Vijeće ministara i Predsjedništvo Bosne i Hercegovine da bi se ove nepravilnosti otklonile. Takođe je postavio pitanje predsjedavajućem i zamjeniku Doma kada će se formirati radna grupa za izradu Poslovnika o radu ovog doma.

- Salih Kulenović je predložio da se što prije na nivou Bosne i Hercegovine donese Zakon o zaštiti i gazdovanju šumama, s obzirom na masovno i nekontrolisano uništenje bosanskohercegovačkih šuma.

- Mariofil Ljubic je postavio pitanje zašto Vijeće ministara i Predsjedništvo Bosne i Hercegovine još nisu dostavili izvještaje o svom radu, pa je u vezi sa tim sugerisao da se za jedno od narednih zasjedanja pripremi širi izvještaj o njihovom radu. Administrativnoj komisiji Doma naroda postavio je pitanje kada će biti izrađene delegatske iskaznice kako bi se delegatima omogućilo kretanje po cijeloj Bosni i Hercegovini, i predložio da se zaduži Administrativna komisija da za naredno zasjedanje pripremi izgled iskaznice kao i predloži zakon o statusu zastupnika. Na kraju je predložio da se inicira Radnoj grupi za izradu obilježja Bosne i Hercegovine da nastavi i ubrza svoj rad.

Nakon delegatskih pitanja za riječ se javio Haris Silajdžić, kopredsjedavajući Vijeća ministara Bosne i Hercegovine i dao neka obavještenja i odgovore povodom postavljenih pitanja.

Sjednica je završena u 13,35.

Magnetofonski snimak sjednice čini sastavni dio zapisnika.

**PREDSJEDAVAJUĆI
DOMA NARODA
PARLAMENTARNE SKUPŠTINE BiH
Avdo Čampara**